

華資工廠調查錄

(專訪梅)

(五十) 競新織造廠

近年來本港織造業之最受打擊者、毛巾廠商而外、當以笠衫廠為最甚、緣此業在萌芽時代極能獲利、其時則因買家久受外貨價高之影響、一旦得有廉價之國貨、故而不趨之、因是而一般昧於大勢之實業家、愈以為此業既有利可圖、遂紛集資設廠、不三年、遂做成供過於求之勢、而各家營業、遂至一落千丈、良可歎也、旺角砵器街競新織造廠、乃專以織笠衫為業者、成立於十年前、規模宏偉、設備週全、實收股本三十萬元、

▲出品

該廠出品有靚牌及佛手牌等之笠衫多種、固完全為線織、故頗得購者樂用、

▲銷場

該廠出品之銷場多在南洋七洲府一帶、而國內之上海去貨亦多、在內地政府未實行關稅政策以前、鄰近之各大商埠銷場亦廣、惟今則此路不通矣、

▲營業

營業狀況、據該廠負責人甘君語記者、謂最盛時一年可得二百餘萬元、現在則約收回一半云、

▲工人

工人前有二百五十、現因適應環境關係、只有一百二十餘女工工作、每人每日約得工值三四毫不等、而為製衣之工作者且可得一元或八毫一日也、生產每日現出一百打、全盛時則可出二百打云、

▲機器

該廠共有鐵機九台、為美國式者、約值十萬元有奇、

▲結論

據甘君語記者謂、此業因受內地關稅影響、及日貨之競爭、前途殊未許樂觀云、